

Pedro ape pũrí ohâ nemoka pũri niî'

A'ti pũrí a'tĩro weéro ohâ no'opã niisé niî'

A'ti pũríre Pedro Ásia di'tapi du'tisté wã'ka'kãrãre ohâki niîwĩ taha.

A'tĩro ohâki niîwĩ. Jesu Cristore êho peósere dohórê'rãre, tohó nií wee' nií dika yuú sĩ'rĩrã nohore ti'ó masĩ dutigi ohâki niîwĩ.

Pedro Jesu Cristore êho peórãre ohâ'ke niî'

1 Yiî Simão Pedro Jesu Cristore da'rá wã'ya ko'tegi kĩî bese kũú'ki misãre äyu dutí'. Niî pe'tirã ísã weeró noho êho peórãre a'ti pũríre ohâ'. Marí Jesu Cristore êho peóse äyusé waro niî'. Jesu Cristo marí wiôgi maríre y'i'riógi kĩîre êho peókã weéki niîwĩ. Maríre ni'kãro noho kĩi yarã wa'akã weéki niîwĩ. ²Ô'ãkĩ hi, tohó niikã marí wiôgi Jesuré masĩ nemoya. Misã tohó weekã, niî pe'tise äyusé, misã ehêri põ'rariپی äyuró ti'ó yã'asere o'ô y'i'ri miharãsama.

Jesu Cristore êho peórãre “A'tĩro weeró iá'” niisé niî'

³Ô'ãkĩ hi kĩî makí Jesu Cristore maríre masikã weéki niîwĩ. Kĩîre masĩrã, kĩî tutuaró me'ra marí kĩî iaró äyuró niiséti masĩrãsa'. Jesu Cristo äyú y'i'riagi, niî pe'tise äyuró weegí maríre kĩi yarã nií dutigi pihiki niîwĩ. ⁴A'tĩro weégi, kĩî tutuaró me'ra maríre “Pehé äyuró weegíti”, niiki niîwĩ. Kĩî tohó nií'ke äyusé waro niî'. Wapatí y'i'ria'. Kĩî “A'tĩro weegíti” niisé me'ra marí kĩî weeró noho niiséti masĩrãsa'. Tohó niikã misã a'ti nukúkãkãhase yã'asé iãri pehasere y'i'ri wetĩrãsa'. ⁵Misã Jesu Cristore êho peó toha'. Misã tutuaró põo tẽoro a'teré wee nemó peoya. Wãkũ tutua, äyuró niisétiya. Tohó niisétiã, Ô'ãkĩ hi yeere ti'ó masĩ nemoya. ⁶Ti'ó masĩ nemorã, misã basi yã'ãro weé sĩ'rĩrã, ni'kayã. Ni'kãrã, mehêkã wa'akã, êho peó du'utikã'ya. Êho peó du'utirã, Ô'ãkĩ hire keoró êho peó, kĩî iaró weeyã. ⁷Kĩî iaró weerã, ni'kĩ põ'ra weeró noho misã basi a'mêri wee tamúya. A'mêri wee tamúrã, niî pe'tirãre ma'iyã.

⁸Misã a'teré siãpe me'ra nemoró wee turiã wã'karã, marí wiôgi Jesu Cristore äyuró masĩrãsa'. Kĩî iaró wee nemórãsa'. “Mehó waro kĩîre êho peópã”, niísome. ⁹Misã teeré tohó weetĩrã pe'e, kapêri i'yã ehatirã weeró noho niísa'. Ô'ãkĩ hi yeere neê masĩtisa'. Misã too dipóropi yã'ãro weé'kere Jesu Cristo akobohó'kere wãkũtisa'. ¹⁰Yiî akawerãrã, misã Ô'ãkĩ hi besé'kãrã niî'. Tohó weerã kĩî besé'kãrã weeró noho nií pe'tise

misâ weé pōo tēoro āyuró niisétiya. Misâ tohō weerā Jesu Cristore ēho peó du'usome. ¹¹ Misâ āyuró weé nu'kurā, marí wiōgi Jesu Cristo tiropi ehârasa'. Toopí maríre yi'riōgi me'ra āyuró nií nu'kukā'rása'.

¹² Yi'í werê'kere masí tohasa'. Teeré masírā, du'u kúuro mariró misâ ti'ó'kere āyuró weé nu'kurā weé'. Misâ teeré masímikā, akobohóri niīgi, werê nu'kukā' ti. ¹³⁻¹⁴ Kā'roākā dī'sása' yi'í wēriátoho. Marí wiōgi Jesu Cristo yi'íre werê tohami. Tohō weégi yi'í katiró ehâ tu'aro yi'í uúkū'kere wākuáto niīgi werê'. Yi'í tohō wereká, āyú niírosa' nií wākūgi, tohō werê'. ¹⁵ Yi'í wērika be'ro yi'í werê'kere āyuró wākū nu'kukā'ato niīgi yi'í pōo tēoro āyuró weegíti.

Pedro Jesu Cristo ĩrigípi dika yuúkā ĩ'yâ'ke nií'

¹⁶ Marí wiōgi Jesu Cristo opáturi a'ti nukúkāpi tutuaró me'ra kīí a'tiátehere werê no'o tohawi. Teeré werêrā, masá naâ wee wiáro noho wākū bahurê'ke mehereta werêwi. ĩsâ basi ĩrigípi Jesu kīí tutuasére ĩ'yâwi. ¹⁷ Kīí pakí Ô'âkī hi kīí tutuasére, kīí asistéseré ĩ'yoká ĩ'yâwi. Kīí tohō weerí kura i'mîsepi uúkūgi, a'tíro niíwī: "Árī yi'í maki yi'í mal'igí niími. Kīí me'ra e'katí'", niíwī. ¹⁸ Kīí tohō uúkū dihosere ĩsâ ti'owí. Títare marí wiōgi me'ra ĩrigípi niíwi. Kīí tigípi niígita asistewí.

¹⁹ Tohō wa'asé me'ra ĩsâ masíwi. "Diporókāharāpi Ô'âkī hi yee kiti werê mi'tarā diakí háta ohāpā Jesu yeékāhasere", niíwi. Naâ ohâ'ke na'í tī'aropi sí'ó'kâ bo'rê yuuse weeró noho nií'. Teeré bu'ê, wākū niriya. Tohō weerā marí Ô'âkī hi iaró niisetí masírāsa'. Teê Jesu Cristo opáturi a'tiká'pi teeré bu'ê, wākū nu'kukā'ya. Bo'rêa mihatikā yōkoáwī mihátiro weeró noho Jesu Cristo a'ti nukúkāpi a'tígi, marí masítisere masiká weegísami. ²⁰ A'te pūríkäre āyuró ti'o masíya. Ô'âkī hi yee kiti werê mi'tarā naâ "Tohō wa'árosa'" nií ohâ'kere marí basi wākusé me'ra "Tohō nií sí'riro weé'", nií masítisa'. Espírito Santo kīí wee tamúro me'ra pe'e marí teeré ti'o masírāsa'. ²¹ Ô'âkī hi yee kiti werê mi'tarā marikā naâ ohâ'kere naâ wākusé me'ra di'akí di'pókátitikārā niíwā. A'tíro pe'e weékārā niíwā. Naâ Espírito Santo ĩ'yosé, ohâ dutiro me'ra Ô'âkī hi yeere ohâkārā niíwā.

Níi soose me'ra bu'esékāhase nií'

(Juda 4-12)

2 Diporópire Israel kurakāharā ni'karérā "ĩsâ Ô'âkī hi yee kiti werê mi'tarā nií'", nií sookārā niíwā. Naâ tohō weé'karo weeró noho misâ tiropi niirá kē'ra meharóta wee sirú tuurāsama. Nií soose me'ra diakí hí weeró noho bu'êrásama. Tohō weerā misâ ēho peósere dohóré'rāsama. Jesu naâ yā'áro weé'ke bu'iri wēri wapa yeé'ki pe'ere iasomé. Naâ tohō weeká, Ô'âkī hi wākútiro naäre bu'fri da'rêgisami. ² Naâ numiäre a'me tárásétisere páhará Jesuré ēho peórā ĩ'yâ kúurāsama. Naâ tohō weeká ĩ'yārā, Jesuré ēho peótirá pe'e Jesu yeé, diakí hí kāhasere yā'áro uúkūrāsama. ³ Niyérure iári peharā, nií soose me'ra misäre bu'êrásama. Naâ tohō weesé wapa naäre bu'fri da'reátehe nií yuu tohasa'. Neé yi'ri wetísome. Diporópi "Ô'âkī hi naäre bu'fri da'rê no'orāsama", nií tohaki niíwī.

⁴ Ô'âkī hi diporópire i'mîsekāharā kīíre werê ko'terā niími'kāräre naâ yā'áro weeká, bu'fri da'rêki niíwī. Tohō weégi naäre bu'fri da'réró na'í tī'ase tutiripi di'te kúú kō'âki niíwī. Be'ró nií pe'tirá masaré beséatihi nimi niiká, naäre bu'fri da'rê bahuriógisami. ⁵ Noé kīí niika tero kē'rare

Õ'ákî hi kîî re êho peóti'kārāre akobohótiki niîwî. Akobohótigi, niî pe'tirā masá yā'arā re miô kō'aki niîwî. Noé, kîî nimó, pō'rā imiá i'tiārā, naā nimosá numia di'akîre yi'rîókî niîwî. Noé masá wākusére dika yuú duti, “Áyuró weeyá”, niî werêki niîmiwî. ⁶Tohó niiká Õ'ákî hi Sodoma, Gomorra wamêtise makarikāharā kē'rare bu'îri da'rêki niîwî. Bu'îri da'rêgi, î h'ke mara di'akî kúyakā naāre î hâ kō'a bahuriókî niîwî. Be'ropîre yā'áro weerāre “Tohó wa'ārosa!” niî masiáto niîgi tohó weéki niîwî. ⁷Naāre bu'îri da'rêgi, Lô áyuró weegí di'akîre yi'rî wetikā weéki niîwî. Lô Sodomakî hi āpêrā tii makákāharā naā yā'â butia'se weeká î'yâgi, kari butîki niîwî. ⁸Kîî áyugí niîki niîwî. Naā yā'arā wa'teropi niîgi, imî kohori niki naā yā'â butia'se weeká î'yâgi, bihâ wetiki niîwî. Tohó niiká naā yā'áro uúküsere ti'óggi, bihâ weti nemoki niîwî. ⁹Õ'ákî hi naāre tohó weé'kere wākūrā, a'ti-ro niî masi'. Õ'ákî hi áyurāre yā'áro wa'aká, yi'rî wetikā wee masísami. Yā'arā pe'ere kîî bu'îri da'reátihî nimi niikápi bu'îri da'reákihî di'te kúu yuu tohasami.

¹⁰Masá yā'asé naā ipikāhāse iāri peha weerá nohore Õ'ákî hi bu'îri da'rê yi'rî ni'kagisami. Tohó niiká Jesu Cristo kîî wiôgi niisére naā yi'rî ni'karā nohore ipîti bu'îri da'rêgisami.

Sō'ó niikārā misāre niî soo siharā naā iaró se'saro, no'ó iaró weé ma'a kusiasama. Uiró mariró i'mîsepi niirā tutuarāre buhíkā'sama.

¹¹I'mîsekāharā Õ'ákî hire werê ko'terā pe'e niî soorā yi'rîóro tutuā yi'rî ni'karā niîma. Tohó niîmirā, yā'arā Õ'ákî hire werê ko'terā niîmi'kārāre Õ'ákî hipire werê sāa, buhíkā'tisama.

¹²Niî soori masa wa'îkîrā weeró noho ti'o masítisama. Naā ti'o masítisere no'ó iaró uúkú ma'asama. Naā ti'ó yā'áro bahuró ti'ó yā'asama. Wa'îkîrā bahuáka be'ro yē'ê wēhé kō'a no'oahā weeró noho niîsama. Naā weeró noho naā kē'ra wērî diharāsama. ¹³Āpêrāre naā yā'áro weé'ke wapa naā kē'ra yā'áro weé no'orāsama. Imî koho, bahú yooropi no'ó iaró yā'áro wee bahá ke'ati ti'sasama. Misá bosé nimiri weeká, naā bopôyaro, yā'â butia'ro weerā weesamá. Weé ta'sase me'ra e'katísama.

¹⁴Numiāre yā'áro wākusé me'ra di'akî î'yāsama. Naā me'ra yā'áro weé si'risama. Yā'áro weesére kari butítisama. Êho peó tutuatirāre naā weeró noho iāri pehakā weesamá. No'ó naā î'yasé niki ia poó'kārā niî yuurā, ia nemókā'sama. Naā bu'îri da'rê no'oahā niîma. ¹⁵Õ'ákî hi yee, diakî hí kāhasere du'úrā, diakî hí niîtise pe'ere siru tuúsama. Naā diporókî hipî Balaão wamêtigi Beor maki weeró noho weesamá. Kîî Balaão yā'áro weesé me'ra niyéru wapá ta'a si'riki niîwî. ¹⁶Kîî tohó weeká î'yâgo, kîi yagó burra kîî re tu'tîko niîwô. Burra uúkúti'ko niîmigo, Õ'ákî hi kîî wee tamúro me'ra masá uúkúro weeró noho Balaōre tu'tîko niîwô. Koô tohó niisé me'ra kîî weé ma'asere du'uká weéko niîwô.

¹⁷Niî soori masa akó wihásé peeri si'bî ke'a'karo weeró noho niîma. Tee peéri ako maríro weeró noho naā yā'arāre áyusé āpêrāre wee tamúse marísa!. O'me kurári wî'ró me'ra tuú wā'karo weeró noho niîma. No'ó iaró weé nu'kuma. Naā ni'ká diakî hita uúkütisama. Bu'îri da'rê no'oahā niî tohama. Tohó weerā na'î tî'aropi tohōta niî bahu dutírāsama. ¹⁸Niî soori masa uúkúse wapa marísa!. Masí butia'rā weeró noho niî soose me'ra bu'êsama. A'ti-ro niîsama. “Marí no'ó iaró marí wee ti'saro noho weeká, áyú niî”, niîsama. Teeré niîrā, naā yā'áro wee wiāse me'ra, tohó niiká naā yā'áro iāri pehase me'ra āpêrāre dohórē'sama. Jesu Cristore êho peó wā'karāre, yā'áro weesére du'ú wā'karāre, opāturi naā yā'áro weé'kere

iári pehakā weesamá taha. ¹⁹Naâ a'tîro niísama. “Misâ ãpêrâ dutisé doka níí wee!. Tohò weérá misâ iaró weeyá”, niímisama. Tohò niímirá, naâ basi yã'asére weé du'u masitirá, yã'asé dutisé doka níí wã'yará weeró noho niísama. Níí pe'tise marí yã'áro weesére du'u masítise tee doká níí wã'ya ko'teká weé!. ²⁰Marí wiôgi Jesu Cristo maríre yí'riógire êho peorâ, a'ti nukúkákãhase yã'asére yí'ri wetíwi. Tohò weéka be'ro niímikâ, opâturi yã'asére wee nemó peorâ noho too dipóro níí'karo nemoró yã'áro tohasamá. ²¹Diakí híta naâre Jesu Cristo yeere, diakí hí kãhasere masíti yí'riokã, äyu boópã. Naâ Jesu Cristore êho peóka be'ro niísama dutisé, naâre werê'kere du'úrã, yã'ã butia'ro weérã weemá. ²²Naâ opâturi yã'áro wee nemó peorã, masá naâ uúkú wíase noho weérã weemá. Naâ a'tîro uúkú wíasama. Diâyí kîî etoáka be'ro opâturi kîî etoákere ba'ásami taha. Apêye kê'ra níí!. Yesé ióka be'ro opâturi meharóta ú'fri bihiropi sí'kó kúyasami taha. Naâ Jesu Cristore êho peóka be'ro yã'áro weérã taha, teé weeró noho nííma.

Marí wiôgi opâturi a'tiátehe níí'

3 Yí'í ma'irá, misäre ni'ká púri ohâ tohawi. Too dipóroka púri, tohò níiká a'ti púri me'ra misäre diakí hí wákuáto níígi ohâ!. Misâ masí'kere wákú nu'ku dutigi werê kasa!. ²Diporókãharãpi Ô'ákí hi yee kiti werê mi'tarã äyurã naâ ohã'kere wákúya. Tohò níiká marí wiôgi, maríre yí'riógi dutisére wákúya. Teeré ísã Jesu Cristo bese kúú'kãrã misäre werê turiawi.

³A'teré masí mi'taya. A'ti imí koho pe'tiátoho diporo masá Ô'ákí hi yeere buhíkã'rásama. No'ó naâ yã'áro weé sí'risere weerã sama. ⁴A'tîro níirásama: “Jesu Cristo kîî “A'tígiti” níí'ke de'ró wa'ámitito?” níirásama. A'tîro níí buhíkã'rásama. “Marí yéki simiã wêri diha pe'tia tohama. A'ti nukúkã neé weé ni'ka'karo weeró noho meharóta níí nu'kukã!. Neé a'tísome”, níí wákúsama. ⁵A'tîro wa'ã'ke pe'ere wákú sí'ritisama. Diporópi Ô'ákí hi kîî uúkúse me'ra í'míse, a'ti nukúkã bahúre'ki nííwí. Kîî dutiró me'ra di'tã akó po'peapi níí'ke bahuákaró nííwi. Tohò níiká akó me'ra a'ti nukúkákãhase pí'rí, bikiákaró nííwi. ⁶Akó me'rata taha Noé nííka terore Ô'ákí hi a'ti nukúkãre miô kô'aki nííwí. Kîî tohò weé'ke me'ra “Ô'ákí hi a'ti nukúkãre díka yúú tohakí nííwí”, níí masí no'ó!. ⁷A'tóka tero níisépiã maha í'míse níisé, a'ti di'takãhase pekã me'e í há kô'ã no'oatehe níí!. Be'ró Ô'ákí hi kîî uúkúse me'rata í há pe'okã'gisami. Kîî masaré beseátihí níími níiká, yã'arãre bu'íri da'rêgi í há kô'agisami.

⁸Yí'í ma'irá, a'teré wákúya. Marí tí'ó yã'akã pe'e maa, mil kí'mari yoã butia!. Ô'ákí hi pe'ere mil kí'mari níí'ká níími weeró noho níísa!. Níí'ká níími kê'ra kîíre meharóta mil kí'mari weeró noho níísa!. Níí'karo noho í'yásami. ⁹Marí wiôgi kîî “Opâturi a'tígiti” níí'kere masá a'tîro wákúsama: “Yogó yí'riami”, nííisama. Naâ wákusé diakí hí níí wee!. Masaré pahã yã'agi, maatã a'títisami yuhúpi. Neé níí'kiré pekã me'epi wa'akã íatísami. Níí pe'tirá naâ yã'asére bihá weti díka yúúkã íasami. Tohò weégi a'títisami yuhúpi.

¹⁰Marí wiôgi opâturi a'ti nukúkãpi a'tirí níími marí neé wákútiri níími níírosa!. Níí'kí yahagí yamí wákútiro yahági a'tígi weeró noho a'tígisami. Kîî dihátiri níími a'tîro wa'ãrosa!. Púúro bisisé me'ra níí pe'tise í'miãropi níisé pe'tiã wa'ãrosa!. Níí pe'tise í há pe'ti diha wa'ãrosa!. A'ti di'takãhase pe'e kê'ra, í há bahu dutírosa!.

¹¹ “Niî pe'tise î hî pe'ti diha wa'ârosa” niisére ti'ó, yā'áro weesétisere du'ú, Ô'âkî hi iaró pe'e āyuró weé nu'kurā. ¹² Marî wiôgi a'tiátehere e'katíse me'ra kîîre ko'têrā. Kîîre maata a'ti dutirā marî āyuró weé pōo tēóta basióro āyuró weerā. Kîî a'tirî nîmi niiká, niî pe'tise i'miárokāhase î hî pe'ti diharosa'. Niî pe'tise a'ti di'takāhase, i'miáropikāhase sipî pe'tirosa'. ¹³ Marî pe'e Ô'âkî hi kîî “Apé ma'má i'mîse, ma'má di'ta weegíti” niî'kere ko'tê'. Toopíre niî pe'tirā āyusé di'akîre weerāsama.

¹⁴ Tohō weerā yi'î ma'irā, kîî a'tisére ko'têrā, niî pe'tise misâ weé pōo tēóro āyuró weeyá. A'tiroweeká, Jesu a'tîgi, misâre āyurā, bu'ri moorā, āyuró ehêri pō'ratarāre boka ehágisami. ¹⁵ Misâ a'tiroweeká. Marî wiôgi marîre pahá yā'agi, marî yi'riká ia sâági ko'têsami. Tohō weégi maata a'titísami. Marî akawerégi Paulo marî ma'igí kē'ra tohōta misâre ohâki niîwî. Ô'âkî hi kîîre masisé o'osé me'ra tohō ohâki niîwî. ¹⁶ Niî pe'tise kîî ohâ'ke pūri niki Jesu Cristo opâturi a'tiátehere, tohō niiká marîre yā'áro weetíkā'ato niîgi ohâsami. Apēye ni'karé kîî ohâ'ke diâsa yi'ria'. Masítirā, tohō niiká êho peó tutuatirā teeré apêrāre weré su'riakā'sama. Naâ apēye Ô'âkî hi yaa pūripi ohâ'kere weré su'riario weeró noho weesamá. Tohō weerā bu'ri da'rê no'orāsama.

¹⁷ Yi'î ma'irā, yi'î misâre naâ niî soorā weeátehere weré yuu tohapi. Misâ tohō weerā masí toha'. Naâ yā'arā misâre niî soori niîrā, ti'o masíya. Tohō niiká misâre êho peó tutuarā niî'kārāre êho peó du'ukā weetíkā'ato. ¹⁸ Marî wiôgi Jesu Cristo marîre yi'riógi pe'ere masí nemoya. Kîî marîre ma'imí niisére masírā, kîîre nemoró êho peó wā'kaya. Niî pe'tirā ni'károakāre, be'ropí kē'rare Jesu Cristore “Āyú yi'riami”, niî nu'kukā'rā. Tohōta niiró iá'.

Toô kâ'rota ohâ'.

Pedro